

## **Hal Ehwal Tanah Air**

### **Tanah Melayu dengan Kedudukannya yang Ajaib**

“Semenjak Raja-raja Melayu membuat perjanjian dengan kerajaan British, banyak surat-surat-surat perjanjian ini, telah dicabuli sehingga menyebabkan bangsa Melayu menjadi dagang di negeri sendiri, dan sekarang ini hingga bahasa, bangsa dan negara pun hendak didagangkan pula...dan dengan itu amanat orang tua-orang tua “takkan Melayu hilang di dunia” itu telah dikhianati...” kata saudara Rahim dalam kupasannya ini—P.Q.

(oleh: Rahim)

Dalam perjanjian Persekutuan Tanah Melayu tahun 1948 adalah dikatakan pemerintahan Melayu itu ialah perkongsian antara kerajaan British dan Raja Melayu. Hak-hak British dalam Tanah Melayu ini ialah Pulau Pinang yang dapat dibeli dari Sultan Kedah—hingga sekarang pun masih ada perjanjian bersendirian— dan Melaka yang didapat dengan pertukaran dengan Bangkulin— dengan Belanda setelah tamatnya perperangan antara kerajaan British dan Belanda dalam tahun 1824; dan hak Raja-raja Melayu itu ialah negeri-negeri Melayu yang lain lagi itu.

Isi kandungan perjanjian tahun 1948 ini terang mengakui Persekutuan Tanah Melayu itu hak negeri Melayu dan adanya kekuasaan British itu ialah dengan persetujuan Raja-raja Melayu yang menjadi wakil dan pemimpin tersendiri bagi bangsa Melayu.

Bukanlah dalam perjanjian tahun 1948 itu sahaja hak ketuanan bangsa Melayu di atas semenanjung Tanah Melayu itu diakui tetapi akuan ini telah pun ada semenjak beratus-ratus tahun yang lewat dan tiap-tiap satu perjanjian yang dibuat oleh bangsa-bangsa barat; Portugis

Belanda dan Inggeris, semuanya dibuat dengan Raja-raja Melayu yang menjadi Raja dan pemerintah di atas negeri-negeri Melayu ini. Bangsa-bangsa asing yang datang menumpang semenjak ribuan tahun yang lewat tidak pernah membuat apa-apa perjanjian pun, kedatangan mereka adalah dengan tujuan semata-mata untuk mencari nafkah hidupnya.

Ini adalah satu pertanyaan dan pertanyaan ini jelas mengatakan bahawa pada sisi undang-undang atau *de jure* Tanah Melayu adalah sebuah negara yang merdeka dan perhubungannya dengan kerajaan British itu adalah secara persahabatan yang diikatkan dengan perjanjian sahaja. Tetapi anehnya kedudukan Tanah Melayu sekarang ialah British itu bukannya lagi bersifat seorang sahabat melainkan seorang tuan besar dan Tanah Melayu adalah jajahan takluk kepada kerajaan British.

Jadi keadaan Malaya adalah aneh sekali iaitu pada sisi undang-undang (*de jure*) Malaya adalah diakui sebuah negara yang merdeka tetapi pada amalannya (*de facto*) Malaya berupa sebuah jajahan takluk British. Agaknya belum ada lagi dalam sejarah sebuah negeri yang

berkeadaan sedemikian itu. Ini adalah satu paradoks (paradox) satu keadaan yang bertentangan dengan dirinya sendiri. Dan nampaknya perjuangan politik kita hari ini adalah mengikut paradoks ini, perkara yang pada hakikatnya tetap salah. Maka inilah menimbulkan “tuntutan kemerdekaan ke London” dan kedatangan Suruhanjaya bebas—sekarang dipanggil Suruhanjaya Perlembagaan yang seharusnya tidak timbul kalau pengertian betul dipakai.

Timbulnya paradoks Malaya ini ialah dari ketiadaan kerajaan pusat bagi Malaya semenjak hancurnya Empayar Melayu Johor dalam abad yang ke tujuh belas. Tiap-tiap negeri Melayu yang dahulunya tunduk kepada Empayar Melayu itu memasyurkan kemerdekaannya masing-masing. Empayar sungguhpun Melayu Johor ini tidak sekuat dan sebesar Empayar Melayu Melaka yang terdahulu daripadanya tetapi adanya adalah menjadi simbol perpaduan kebangsaan Melayu dan kedaulatannya di atas bangsa Melayu tetap diakui dan dihormati oleh setiap keluarga Melayu.

Maka dari kekosongan inilah timbulnya keperluan kepada matlamat tumpuan taat setia yang bulat dengan kemajuan-kemajuan dan perubahan-perubahan yang datang: dan disebabkan oleh Raja-raja Melayu yang baru merdeka itu tidak mahu mengalah atau tunduk antara satu sama lain, inilah mereka sanggup menerima seorang pegawai tinggi bangsa Inggeris duduk di atas tetapi tidak memakai gelaran sultan atau raja seperti mereka biar pun kekuasaannya mengatasi taraf dan kekuasaan Sultan atau Raja.

Maka dengan pengakuan penerimaan pegawai-pegawai tinggi British yang mempunyai kekuasaan penuh itu kekuasaan politik Malaya dengan sendirinya terserah kepada kuasa asing dengan tidak sengaja hingga akhirnya menerbitkan

kesilapan faham dalam kalangan raja-raja itu sendiri dengan menyangka bahawa British lah mempunyai kekuasaan tertinggi di Malaya. Dan bangsa British yang terkenal kepintarannya tidak pula payah untuk mengubah kekuasaan ini. Dan kepintaran atau keceknya—itu tidak dipakai kekuatannya memaksa penerimaan segala kehendak dan kemahuannya.

Persahabatan antara Raja-raja Melayu dengan kerajaan British itu adalah persahabatan di antara musang dengan singa atau timun dengan durian sahaja layaknya.

Satu-satu perjanjian atau *treaty* yang dibuat dengan kuasa asing itu adalah mempunyai kekuatan undang-undang negeri dan *treaty* tahun 1948 yang dibuat antara Raja-raja Melayu dengan kerajaan British itu adalah dijadikan perlembagaan bagi Malaya pula atau menjadi pokok bagi segala undang-undang. Maka oleh kerana *treaty* ini kekuasaan tertinggi diberikan kepada British maka itulah timbulnya paradoks Malaya itu besar akibatnya kepada menuntut kemerdekaan bagi sebuah negara yang telah merdeka kepada kuasa asing yang tidak mempunyai hak atau kuasa memberi kemerdekaan itu.

Semenjak Raja-raja Melayu membuat perjanjian, atau *treaty*, dengan kerajaan British banyaklah surat perjanjian-perjanjian itu telah dicabuli hingga menyebabkan bangsa Melayu menjadi dagang di negeri sendiri dan sekarang ini hingga bahasa, bangsa dan negara pun hendak didagangkan pula --bahasa di-Inggeris-kan dan bangsa dan negara di-Malayan-kan dan dengan itu amanah orang-orang tua “takkan Melayu hilang di dunia” itu telah di khianati oleh bangsa Melayu sendiri yang akan menjadikan dirinya bangsa Yahudi yang ke dua dalam dunia ini bahkan lebih buruk daripada itu kerana Yahudi tetap ada bahasa dan bangsanya hanya negerinya saja yang tiada—sekarang pun sudah ada—tetapi Melayu akan musnah semua sekali—bahasa, bangsa

dan negaranya.

Maka kalau inilah yang diertikan kemerdekaan dan pembelaan nasib nusa dan bangsa, berlindunglah saya daripada syaitan yang kena rejam. Hiyahat Hiyahat--!!

Tetapi walau bagaimanapun adalah menjadi kewajipan seluruh bangsa Melayu untuk mempertahankan ini dan mereka tidak harus membiarkan dirinya ditonjol hidungnya oleh pengeliru-pengeliru yang disangka pemimpin itu. Dan untuk ini mereka ada asas atau tapak perjejakannya yang tidak dapat diketepikan oleh manusia seluruhnya.

Tapak perjejakkan ini ialah sejarah bangsa kita sejak ribuan tahun yang lewat yang telah memerintah Tanah Melayu ini dan mendirikan corak pemerintahannya, menegakkan bahasa dan kebudayaannya dan mengeratkan cogan-cogan kebangsaannya yang masih boleh didapati saki bakinya hingga ke hari ini. Dan pengakuan sejarah ini adalah dikuatkan lagi dengan perjanjian yang telah dibuat oleh pemimpin-pemimpin bangsa Melayu dengan kuasa-kuasa barat: Portugis, Belanda dan akhirnya Inggeris dan perjanjian akhir ini ialah perjanjian tahun 1948 yang dengan kuat kuasanya itulah pemerintahan sekarang mengambil kekuasaannya.

Dalam perjanjian ini adalah mengakui bahawa Malaya hak Melayu dan bangsa-bangsa asing itu penumpang sahaja. Maka oleh kerana perjanjian itu mempunyai kuat kuasa kanun negeri bahkan bagi Malaya ia menjadi asas atau tapak bagi undang-undang, maka satu-satu perkara yang di buat keluar dari undang-undang ini adalah haram dan tidak sah dan tidak boleh di pakai.

Saya tidak nampak sebabnya kenapakah dalam masa delapan tahun sahaja hak pertuanan Melayu di atas bumi Malaya ini hendak di hapuskan dan tuntutan bangsa-bangsa asing yang tudak berhak itu di layangkan. Undang-undang *International*

mengharamkan orang asing mencampuri politik negara orang lain. Marilah sama-sama kita lihat gerak langkah pemimpin-pemimpin kebnagsaan kita dan camkan mereka itu adalah menjadi alat bangsa lain untuk menghancurkan bangsa kita. Kewajipan kita sekarang ini ialah mempertahankan pasak suci kita ini yang di atasnya telah dikorbankan beratus-ratus ribu kesatria bangsa kita. Ia telah dibinakan di atas tulang-tulang daging dan darah pemuda pemudi kita untuk menepati kata "takkan Melayu hilang di dunia".

\* \* \*

